

ԱՐԵՎՄՏԱՅԱՅ ՎԱՆԱԿԱՆ ՏՆՏԵՍՈՒԹՅՈՒՆԸ

(XIX դարի երկրորդ կես – XX դարի սկիզբ)

ԱԶԱՏ ՀԱՄԲԱՐՅԱՆ

XIX դարի կեսերին արևմտահայ հասարակական-քաղաքական, հատկապես հոգևոր շրջանները սկսեցին հարց բարձրացնել այն մասին, որ պետք է զբաղվել ազգային վանական-եկեղեցական տնտեսության խնդիրներով, պարզաբանել հայոց սրբությունների ներկա վիճակը և նշել ապագան: 1852 թ. մարտի 22-ին «Մասիս» գրում էր, որ ազգային վանքերը «քիչ թե շատ ընդարձակ հողեր ունին, որոնք առայժմս հիմիկ ու հիմա կամ բոլորովին անմշակ ամայի թողված են կամ միայն քանի մը վանականաց սակավիկ պիտոյից չափ կմշակվին»: Եուրջ 13 տարի անց՝ 1865 թ. փետրվարի 20-ին նույն թերթը գրում էր. «Գրեթե ամեն վանք անշարժ կալվածներ ու եկամուտներ ունի, որ հիմա մեծ մասամբ ի զուր կկորսվի և չենք դիտեր որոնց կոկորդը կլցվին: Ամեն բանն առաջ, և որպեսզի վանորենից մեջ պետք եղած բարեկարգությունները գործադրելու դժվարությունները վերանան, պետք է, որ անոնց ելմտից հաշիվները կարգի դրվելով ազգային մեծ գումարի մը մեջ արձանագրվին: Առանց ամեն մեկ վանքի նյութական միջոցներ գիտենալու, անհնար է պետք եղած բարեկարգություններ տնօրինել և առանց այն միջոցներն զգուշավոր խնայողությամբ գործադրելու, չենք կարծեր, որ վանորենից նկատմամբ հաստատուն բան մը ընելու կարելի ըլլա»:

Պարբերականի այդ ահագանդերը թեև ուշ, բայց գտան իրենց արձագանքները: 1872 թ. Կ. Պոլսի վանքերի խորհուրդը նշում էր, որ Օսմանյան կայսրությունում կան շուրջ 80 վանքեր, որոնք ունեն հարյուրավոր արտեր, արոտներ, այգիներ, պարտեզներ, ձիթարաններ, ջրաղացներ, զանազան տներ ու խանութներ: Ցավոք, անհայտ է մնում, թե գբանցից քանիսն ունեն համապատասխան փաստաթղթեր, քանիսն են գտնվում կողմնակի անձանց ձեռքերում, քանիսն են մշակվում կամ մնում անմշակ, քանիսն ունեն անասուններ, քանիսը՝ ոչ: Եստ վանքեր «իրենց արոտներու շնորհիվ կրնային կարևոր հասույթ ձեռք բերել, եթե անասուններ պահեին»¹:

Բայց վանքերի խորհուրդը ոչ միայն չլուծեց այդ խնդիրները, տյլև ցրվեց, թողնելով միայն իր նիստերի արձանագրությունները, իսկ գավառական վիճակների հոգևոր առաջնորդները, վանահայրերն ու միաբանները, համարելով իրենց իրերի տերեր, վարվում էին վանքապատկան ու եկեղեցապատկան ունեցվածքների հետ ինքնազուլս, որևէ հաշիվ չտալով վերևներին²: Նահանգներում ու գլխավոր քաղաքներում հայոց

1 «Մասիս», 1892, մայիսի 16, էջ 109:

2 Տե՛ս նույն տեղում, օգոստոսի 29:

Հոգևոր ղեկավարները վարդապետներն էին, իսկ գավառներում կամ կայ-մակամոլթյուններում՝ եպիսկոպոսները: Սրանց մեծ մասը գործարքի մեջ էր մտնում թուրքական պաշտոնյաների ու քրդական ցեղապետերի հետ և վանքերի ու եկեղեցիների հարստությունները տնօրինում իրենց հայեցողությամբ: Իսկ պատրիարքարանը, «Մասիսի» վկայությամբ, «խիստ անհող է գավառաց վրա և խնամք անդամ չունի, կթվի թե գավառականք ազգային նշանակութուն չունին պատրիարքարանի համար: Պատրիարքարանը ... ասոր անոր միջնորդությամբ վարդապետ մը առաջնորդ ընելով ժողովուրդը կհանձնե անոնց»: Ժողովուրդն էլ ստիպված է լինում «կամ կրոնափոխության դիմել և կամ այլևայլ միջոցներ գործածել այն բռնավորներեն ազատվելու համար»³:

Թուրքական կառավարութունը թանգիմաթի տարիներին թեև հայտարարեց ազգերի իրավահավասարութուն, բայց նրա այդ հայտարարութունը մնաց թղթի վրա: Հայկական ինչպես այլ, այնպես էլ Հոգևոր հաստատությունները չէին օգտվում այն իրավունքներից ու արտոնություններից, որոնցից օգտվում էին մահմեդականներին: Կառավարութունը, օրինակ, օրենքով պաշտպանում էր մեջեջների ու մզկիթների ունեցվածքը, իսկ հայոց վանքերին ու եկեղեցիներին հայտարարում էր մահալուլ, այսինքն՝ անտեր: Բաֆֆին 1870-ական թվականներին քննադատում էր այդ վարքագիծը: «Ճաճկաց կառավարութունը, — գրում էր նա, — վանքային կամ եկեղեցական կալվածք չէ ճանաչում, որովհետև կալվածատեր կարող է լինել միայն անձնավորութուն ունեցող անհատներ, իսկ վանքը և եկեղեցին նրա կարծիքով իրավաբանական անձնավորութուն չէ, ուրեմն և կալվածատեր լինել կարող չէ... Այս պատճառով վանքային կալվածները համարվում են որպես մահալուլ, այսինքն՝ որոշ տեր չունեցող: Այսպիսի կալվածքների տերն ինքը, պետութունն է լինում ... չենք կարողանում հասկանալ, թե ինչու մահմեդականների մզկիթը և մադրասան կարող են կալվածք (վազրֆ) ունենալ, բայց հայոց եկեղեցին, վանքը և դպրոցը չեն կարող ունենալ»⁴:

Օգտվելով կառավարության այդ քաղաքականութունից, մահմեդականները, հատկապես աղաներն ու բեյերը, զանազան եղանակներով հափշտակում էին հայոց վանքապատկան ու եկեղեցապատկան կալվածքները կամ հարկերի ու տուրքերի տակ էին դնում դրանք: Ահա փաստեր: 1872-1873 թթ. Երեմիա Տեկանցը, ճանապարհորդելով Բարձր Հայքով ու Վասպուրականով, գրում էր, որ քրդերը գավթել են Անիի մոտ գտնվող Ուչքիլիսա վանքը, բնակվում են վանքում, իսկ եկեղեցին դարձրել են մարազ⁵: Բասենում 30 քրդական ընտանիք բռնագրավել են Հոփերունք վանքը, դարձրել են այն իրենց բնակարան, իսկ եկեղեցին փարախ: Նույն շրջանում գիլանցի քրդերը սեփականացրել են Վարդեհեր վանքը և նրա հողերում տներ կառուցել⁶: Ե. Տեկանցը շարունակում էր. «Արճեչո Արծ-

3 «Մասիս», 1869, մայիսի 24:

4 Բ ա ֆ ֆ ի. Երկերի ժողովածու. հ. 9, Երևան, 1964, էջ 233:

5 Երեմիա Տեկանց. Ճանապարհորդութուն Բարձր Հայք և Վասպուրական (1872-1873): Չեռագիրը պատրաստել և ծանոթագրել է Ն. Ե. Պողոսյանը. Երևան, 1991, էջ 81:

6 Նույն տեղում, էջ 119:

վագիր վանքի քով քրտեր տուն շինելով հողերու մեծ մասին տիրեր են, վանահայր տեր Սողոմոնն քանիցս բողոքեր է լսելի չի եղեր...»⁷: 30 տարի սուղ Սստանա քրդեր Ս. Աստվածածնի վանքի հողերից «124 չափի տեղ հափշտակեր են, վանահայր տեր Սարգիս առաջին տարիներ բողոքեր է առ կառավարութիւն, այս տարի ևս բողոքեց և շատ աշխատեցավ, սակայն կառավարութիւն ոնց չուզեց վանքի սեփականութեան իրավունք ճանաչել և վերադարձնել...»⁸: Մոկաց աշխարհի Աուրբ Կարապետ վանքի հողերը նույնպէս «քրտերը թափու ըրած են յուրյանց վրա»⁹: Տեկանցր նաև հիշատակում էր, որ Սուրբ Խաչ վանքում հաստատվել է քուրդ Տեվրիշը և Արրահամ անունով մի աշխարհականի «յուր կողմանէ նստեցուցեր է վանքի մեջ, իրրև պահապան: Հողեր և կալվածներ Տեվրիշ պեյի ձեռքն է: Վանքն ունի մի ճոխ կղթորի ծառաստան, որ տարին առնվազն կրնա 5-6 հազար դուրուչ եկամուտ բերել, սակայն ավաղ, որ դարձյալ քրտեր տիրապետեր են ծառաստանին եկամուտն իրենց սեփականելով»¹⁰: Գ. Սրվանձտյանցը հիշատակում էր, որ քրդերը Տիգրտնակերտի վիլայեթում նույնպէս ղավթկ են հայոց մի շարք վանքերի հողերը¹¹: Կասկածից վեր է, որ նրանք բռնագրավել էին հայ վանքերի հողերը Արևմտյան Հայաստանի նաև այլ շրջաններում:

Քրդերը մի շարք տեղերում վանքերից գանձում էին զանազան հարկեր ու տուրքեր: 1874 թ. ապրիլի 25-ին Կ. Պոլսի հայոց պատրիարքարանին հաղորդում էին, որ Մշո գավառի Մահպուլանակ գյուղի քրդերը «կերթան Աղրյուրիկ վանքը, կուտեն կիսմեն և ամեն տարի իրրև տուրք վանքեն 400 դուրուչ, 4 կով, 20 ոչխար, 4 բաթման ծխախոտ, 4 բաթման յուղ, 5 գրիվ ցորեն կառնուն բռնի: Եթե վանքը զանոնք չհատուցանե, միաբանութիւնը և հայերը մեծ վտանգի կենթարկվին»¹²: Մի այլ աղբյուրում հիշատակվում էր, որ քրդերը Մշո Ս. Առաքելոց վանքից ամեն տարի իրրև խաֆիրութեան տուրք առնում են ցորեն, ոչխար, յուղ, ձեթ և այլն¹³:

Քրդերը հափշտակում էին անդամ վանքերին ուխտավորների նվիրած գումարների մի մասը: Ցեղապետերը կամ աղաները հատուկ մարդիկ էին նշանակում վանքերում, հանձնարարելով հաշվել այդ գումարները, որ

7 Նույն տեղում, էջ 157:

* Քանի որ հողվածում օգտագործվում են չափերի ու կշիռների միավորներ, ապա ներկայացնում ենք գրանց համարժեքները.

– 1 չափը=45-50 օկկայի, իսկ 1 օկկան կամ հոխան՝ 400 գրամի կամ 3 ֆունտի:

– 1 բաթմանը=6 օկկայի (վանի վիլ.)

– 1 գրիվ ցորենը=1 քիլեի, իսկ 1 քիլեն=56 օկկայի

– խաֆիր արարեբեն պահապան

– 1 քիլեն=180 օկկայի կամ 14 փրի և 2,5 ֆունտի (Դիարբեքիրի վիլ.)

– 1 սոմարը=է 16 փթի (Կարնո վիլ.)

– հոխա=օկկայի կամ 400 գրամի

– քոռ-արմտիքների չափը=է 293 կգ 760 գրամի, տարողութիւնը 326,4-367,2

լիտր:

8 Նույն տեղում, էջ 170:

9 Նույն տեղում, էջ 174:

10 Նույն տեղում, էջ 175:

11 Տե՛ս Գ. Սրվանձտյան և Գ. Թորոս աղբար, Հայաստանի ճամբորդ. հ. 2, Կ.

Պոլիս, 1879, էջ 242:

12 Ատենադրութիւնը Ազգային ժողովո. Կ. Պոլիս, 1876, էջ 218-219:

13 Տե՛ս Դիվան հայոց պատմութեան. հ. 13, Թիֆլիս, 1915, էջ 62:

փելով իր դիտումները, Ե. Տեկանցը գրում էր. «... մեր շրջադաջյալ դավա-
նաց մեջ չկա վանք մի, որո հողը ամբողջ մնացեր է, ամեն մեկն թե շատ
և թե քիչ կրճատվեր է...»²³:

Հայոց վանքապատկան-եկեղեցապատկան կալվածքները բռնագրա-
վում էին գերազանցապես քրգերը: Եթե գյուղացիները դիմագրավեին,
նշում է Ե. Տեկանցը, այդ բռնագրավումները համեմատաբար քիչ կլի-
նեին: Բայց խնդիրն էլ այն էր, որ սուլթանական կառավարությունը հո-
վանավորում էր զավթիչներին և պատժում դիմադրող հայերին:

Արեմտահայ վանքերի ու եկեղեցիների հողերի հափշտակումները
մեծ չափերի հասան 1890-ական թվականների հայկական ջարդերի ժամա-
նակ: Ըստ Հ. Առաքելյանի բերած տվյալների, որոնք նա քաղել է 1912 թ.
կաթողիկոս Իզմիրլյանի արխիվից և հրատարակել «Արոր» ամսագրում,
այդ տարիներին քրիստոնեական-լուսավորչական հուշարձաններից կո-
ղոպտվել են 791 եկեղեցի, 85 վանք, քանգվել են 157 եկեղեցի, 26 վանք,
հրկիզվել են 50 եկեղեցի, 9 վանք, մզկիթի են վերածվել 48 եկեղեցի, 10
վանք: Հայ կաթողիկ հուշարձաններից կողոպտվել են 4 եկեղեցի, քանգվել
են 2 եկեղեցի, մզկիթի է վերածվել 1 եկեղեցի: Հայ բողոքական սրբատեղե-
րից քանգվել է 11 ժողովատեղի, 8 վարժարան, հրկիզվել է 19 ժողովատե-
ղի, 1 վարժարան, մզկիթի է վերածվել 1 ժողովատեղի, զորանոց են դարձ-
վել 1 ժողովատեղի և 1 վարժարան²⁴:

Չնայած այդ ամենին XIX դ. վերջին ու XX դ. սկզբին Արևմտյան
Հայաստանում այնուամենայնիվ գեռ պահպանվում էին բազմաթիվ հայ-
կական վանքեր ու եկեղեցիներ: Այսպես, 1903 թ. Կարնո վիլայեթում
հաշվվում էր 29 վանք, 276 եկեղեցի, Բաղեշի վիլայեթում՝ 20 վանք, 234
եկեղեցի, Վանի վիլայեթում՝ 33 վանք, 138 եկեղեցի, Խարբերդի վիլայե-
թում՝ 15 վանք, 190 եկեղեցի, Տիգրանակերտի վիլայեթում՝ 10 վանք, 79 ե-
կեղեցի և, վերջապես, Սերաստիայի վիլայեթում՝ 12 վանք, 120 եկեղեցի,
կամ Արեմտյան Հայաստանի վեց վիլայեթներում կային 119 վանք, 1037
եկեղեցի²⁵: Գրականության մեջ հիշատակվում է նաև, որ ամբողջ Թուր-
քիայում XX դ. սկզբին կար հայկական 134 վանք և 1388 եկեղեցի²⁶:

Այդ վանքերից շատերը դեռ ունեին անշարժ ու շարժական գույք,
վարում էին իրենց տնտեսությունները: Էրզրումի վիլայեթի Ա. Լուսավոր-
չի վանքը, օրինակ, 1898 թ. ուներ 40 արտ, մի քանի տասնյակ ոչխարներ,
2 գուլյգ եգ, մուտքն էր 100–150 ոսկի, ելքը՝ 60–65 ոսկի²⁷: Այդ նահանգի
Ս. Կարմիր վանքն ուներ «բավարար չափով լծկան անասուններ և հարյու-
րակ մր կովեր, որոնք վանքի համար կապահովեին նյութական կարևոր
հասուցի մը»²⁸: Բիթլիսի վիլայեթի Ս. Աստվածածին վանքը տիրում էր 40
արտերի, որոնցից տարեկան ստանում էր 1000 կոտ ցորեն: Այն ուներ նաև
խոշոր ու մանր եղջերավոր անասուններ: Վանքի տարեկան եկամուտը

23 Նույն տեղում:

24 Տե՛ս «Արոր», 1913, դեկտեմբեր, էջ 78:

25 Ընդարձակ օրացույց Ս. Փրկչյան հիմնադրանոցի հայոց. Կ. Պոլիս, 1903, էջ 320-
346 (հաշվումները կատարված են մեր կողմից):

26 Չ ի թ ու ն ի. Հուշիկք Հայաստանի. Կ. Պոլիս, 1919, էջ 65-66:

27 «Բյուզանդիոն», 1898, հունիսի 26:

28 Ղ ա զ ա ը Ջ ա ը ը գ. Հուշամատյան Բարձր Հայքի. Պեյրութ, 1957. էջ 86:

Հասնում էր շուրջ 200 ոսկու²⁹: Ս. Կարապետ վանքի Հարստության մասին հիշատակում են եվրոպացի հեղինակները: Ֆրանսիացի գիտնականներ Ժորժ Պիսոն և Ալբեռ Դրվրլիեն 1890 թ. ճանապարհորդելով դեպի Պարսկաստան, դրում էին, որ Ս. Կարապետ վանքի կալվածքները «բավական ընդարձակ են (ձիով ծայրե ի ծայր գնալու համար մի քանի ժամ է հարկավոր) և բաղկացած են հատանելի անտառներից, հերկելի դաշտերից և խոտավետ լայն սարահարթերից...: Այժմ վանքն ունի երեք ագարակ, ուր պահում են 1000 գլուխ այծ ու ոչխար, 100 եզ ու կով, 60 ձի, 20 էջ, 4 ջորի և 156 ծառա»³⁰: Խարբերգի վիլայեթում իր հարստությամբ հայտնի էր Ս. Հովհան վանքը, որը ցանում է 60 քոռ սերմ (1 քոռ=60-62 օխայի) և ստանում է տարեկան 80 օսմանյան ոսկու եկամուտ: Եթե իր հողերը լավ մշակի, կարող է ստանալ մինչև 150 ոսկու հասույթ³¹, բայց այդ կուսակալությունում իր ունեցվածքով ավելի նշանավոր էր Ս. Գևորգ վանքը: Այն ուներ 480 քոռ արտ, 265 քոռ անմշակ հող, 10 արտավար այգի, 11 արտավար արոտ և 94 արտավար պարտեզ: Ականատեսը դրում էր, որ այս վանքի «հողերն այնքան արգասավոր են, որ գավառիս ամեն տեսակ բերքեր ամենաազնիվը կարտադրե, մանավանդ ցորյանն ու լուբիան...»³²: Ապա շարունակում էր, որ այդ վանքի հողերի 2/3-ը ջրարբի է: Եթե ցանկուցյուն լինի, մյուս մասերն էլ կարելի է դարձնել ջրարբի: Ս. Գևորգ վանքը տարեկան ստանում է 80-90 օսմանյան ոսկու եկամուտ: Լավ մշակելու դեպքում այդ թիվը կարող է հասցնել 150-160 ոսկու³³:

Ամենահարուստը, սակայն, Աղթամարի վանքերն էին, որոնք ունեին ընդարձակ վարելահողեր՝ «կես ջրարբի և կես անջրդի», արոտավայրեր՝ «ոչխարաց ու խաչանց համար», այգիներ ու բանջարանոցներ: Վանքերի տնտեսությունն իր ձեռքը վերցրած Մ. Խրիմյանը կառավարությունից գնեց Վերին Խոչապ գյուղում գտնվող «Սալախանե» ամայի կալվածքը, բնակեցրեց այն տարբեր տեղերից բերված 30-40 հայ ընտանիքներով, հատկացրեց յուրաքանչյուրին նրանց անդամների թվին համեմատ հողաբաժին՝ պարտավորեցնելով տալ «զկայսերն կայսեր, և զԱստուծոյն Աստուծոյ»³⁴: Մ. Խրիմյանի առաջարկությամբ մեծացվեց «Սալախանեի» մոտերքում ընկած լճակը՝ նոր տարածքներ յուրացնելու և գյուղացիների հողերը ոռոգելու համար: Այնուհետև, նրա ջանքերով Եվրոպայից բերվեցին երկրագործական կատարելագործված գործիքներ և հատկացվեցին Ս. Վարդա վանքին³⁵:

Ի՞նչ աշխատանք էր կիրառվում վանքերում: Այդ հարցը լուսաբանելու համար վիճակագրական տվյալներ չունենք: Կան միայն ժամանակի հեղինակների վկայութունները, որոնց հիման վրա կարելի է հանգել որոշակի եզրակացության: Բերենք այդ վկայութունների մի մասը:

29 «Բյուզանդիոն», 1897, նոյեմբերի 24:

30 «Արձագանք», 1892, հունվարի 19, № 8:

31 «Արաբս», 1888, գիրք Բ, էջ 35-36:

32 Նույն տեղում:

33 Նույն տեղում:

34 Մ. Մ ի ռ ա խ ո ղ յ ա ն. նշվ. աշխ., էջ 45:

35 Տե՛ս Ե. Լ ա լ ա յ ա ն. Վասպուրական, նշանավոր վանքեր. Ա պրակ, Թիֆլիս, 1912, էջ 59:

1859 թ. «Արծիվ Վասպուրականին» գրում էր, որ Վանի վիլայեթի Ս. Խաչ վանքի հողերը մշակում է մի վարդապետ «քանի մը մշակներով»³⁶: Գեներալ-մայոր Մ. Լիխուսինը նշում էր, որ Բայազետի սանջակի Ս. Հովհաննես վանքի գյուղերում հաստատված բնակիչները իրենց ստացած հողերի գիմաց վանքին վճարում են հավաքած ըրեքով և նրա օգտին կատարում են ծառայություններ³⁷: Մալաթիայում Ս. Լուսավորիչ վանքը իր արտերը հնձել էր տալիս քրդերին³⁸: Խարբերդի գավառի Ս. Սորսրու վանքը ուներ 10 տուն գյուղացի, որոնք վանքի մարարաններն էին (այսինքն՝ ֆեոդալական կախյալ գյուղացիներ) «իրենց ընտանեոք և անասունովք»: Նրանք մշակում էին «վանքի 81 ընտիր արտերը»³⁹: Նույն գավառի Դատեմ գյուղի վանքն իր արտերը տալիս է մշակելու մարաբաններին, որոնցից ստանում է տարեկան 100 քիլե ցորեն, 50 քիլե դաբի, 100 հոխա բամբակ և այլն⁴⁰: Բալուի գավառի Հավավու, Պաղին և Ս. Ստվածածին վանքերն իրենց արտերը մշակում էին մարարաններին⁴¹, իսկ Ս. Խաչ վանքը՝ մշակների ուժերով⁴²: Վանի վիլայեթի Աղբակ գավառում գտնվող Ս. Բարդուղիմեոս վանքի հողերը մշակում էին 20 տուն հայ և 20 տուն քուրդ գյուղացիներ⁴³: Ցավոք, Մ. Միրախորյանը չի նշում դրանք կիսրարներ էին, թե վարձու աշխատողներ: Ե. Տեկանցը գրում էր, որ Կարնո վիլայեթի Ս. Լուսավորչաց վանքն ունի 30 սոմար արգավանդ հող, որը տրվում է վարձով⁴⁴: Ապա ավելացնում էր, որ այդ վանքը տարին 3000 ղուրուշ է ծախսում մշակների ու հովիվների վրա⁴⁵: Նույն հեղինակի վկայությամբ, Բասենի Մագիստրոս վանքը վարձում էր 4 մշակ, որոնց տալիս էր 2000 ղուրուշ և հովիվներ ու ծառայողներ (թվաքանակը չի նշում)՝ վճարելով նրանց 1700 ղուրուշ⁴⁶: Ս. Հովհաննես վանքը վարձում էր 53 հոգի, որից 23-ը զանազան գործավորներ, 6-ը հացթուխ, կովկիթ և այլ կանայք, մնացածը նախրապաններ, հորթարածներ, հովիվներ և այլն⁴⁷: Վանի վիլայեթի Ս. Գրիգորի վանքը ուներ 11 թեմական գյուղ, որի արոր ու գուլթան ունեցող ամեն մի տուն տարին 1 օր ձրի բանում էր վանքի համար⁴⁸: Նույն վիլայեթի Կարմրորու Ստվածածնի վանքը ուներ 2 մշակ, 5 հոտաղ, 2 տնտես: Ուներ նաև 2 թեմական գյուղ, որոնց ամեն մի տուն տալիս էր վանքի տնտեսության մեջ աշխատելու համար 1 սարակ⁴⁹: Վիլայեթի Կտուց Ս. Անապատի վանքն ուներ 20 մշակ ու 2 թեմական գյուղ: Գյուղև-

36 «Արծիվ Վասպուրականին», 1859, էջ 87:

37 М. Л и х у т и н. Русские в Азиатской Турции в 1854-1855 годах. СПб., 1863, с. 165.

38 Տե՛ս Գ. Սրվանձտյան ց. նշվ. աշխ., էջ 313:

39 Նույն տեղում, էջ 88:

40 Նույն տեղում, էջ 89, ա՛ն նաև «Արևելյան մամուլ», 1884, էջ 115:

41 Գ. Սրվանձտյան ց. նշվ. աշխ., էջ 168:

42 Նույն տեղում, էջ 179:

43 Մ. Միրախորյան. նշվ. աշխ., էջ 80, 84:

44 Երեմիա Տեկանց. նշվ. աշխ., էջ 44:

45 Նույն տեղում, էջ 57:

46 Նույն տեղում:

47 Նույն տեղում, էջ 145:

48 Նույն տեղում, էջ 244:

49 Նույն տեղում, էջ 246:

ընդ յուրաքանչյուր տուն վանքին տարեկան տրամադրում էր 1 աշխատող արտերը հնձելու համար⁵⁰: Վանի վիլայեթի Լիմ Ս. Անապատի վանքն ուներ 18 մշակ, 3 պառավ կին և մարաբաներ (թիվը չի հիշատակվում): Վանքն իր տնտեսությունը վարում էր դրանց միջոցով⁵¹:

Վարադա Ս. Նշան վանքը պահում էր 34, Ս. Աստվածածինը՝ 8, Աղթամարի Ս. Խաչը՝ 15 մշակ, իսկ Բերգաձորի Ս. Աստվածածինն ուներ 12 տուն գյուղացիներ, որոնք մշակում էին վանքի հողերը, բերքի 5 բաժինը մեկը տալով վանքին⁵²:

Բերված փաստերը ցույց են տալիս, որ արևմտահայ վանական տնտեսության մեջ գերիշխում էին շահագործման ֆեոդալական ձևերը՝ կիսրարությունը, մարաբայությունը, սարակությունը, իսկ կապիտալիստական եղանակները՝ մշակությունը կամ ագատավարձու աշխատանքը անհամեմատ քիչ էին օգտագործվում: Սակայն պիտի նկատի ունենալ, որ մարաբաների մի զգալի մասը գյուղատնտեսական բանվորներ կամ բաժնակներ էին: Հանրահայա է, որ կապիտալիզմը գյուղատնտեսության մեջ ոչ միշտ է անջատում կամ բաժանում անմիջական արտադրողին հողից, բազմաթիվ դեպքերում այն, ընդհակառակը, նրան ամրակցում է հողին, տալով նաև արտադրական միջոցներ:

Հայոց վանքերն ու եկեղեցիները թույլ էին ընդգրկված, իսկ մի մասը բոլորովին ընդգրկված չէր շուկայական հարաբերությունների մեջ: Բացառություն էր կազմում Վարադա վանքը, որի տնտեսական գործունեությունն ուներ գերազանցապես ապրանքակապիտալիստական բնույթ: Ե. Տևկանցը նշում էր, որ 1873 թ. մայիսին նրա եկամուտները կազմում էին 30200 դուրուշ, որի մեծ մասը ստացել էր ցորենի, ոչխարների ու դառների, պանրի, յուղի, խոտի, բրդի վաճառքից, իսկ ծախսերը՝ 20765 դուրուշ⁵³:

Վարադա վանքի աննախագեպ զարգացումը պայմանավորված էր Խրիմյան Հայրիկի եռանդուն գործունեությամբ: Ե. Տևկանցը 1873 թ. դրում էր, որ 17. տարի առաջ նա հատուկ կոնդակով վանահայրությունն անջատեց առաջնորդարանից և վերցրեց իր ձեռքը: Դրանով Խրիմյանն ազատ գործունեության հնարավորություն ստացավ: Այդ պատճառով թուրք իշխանավորները և թուրքամետ հայ գործիչները «սկսան թշնամություններ վարվել վանահոր դեմ, գանազան տեսակ արգելքներ հարուցին Խրիմյանի դեմ, տպարան դոցեցին, դպրոցին հակառակեցան, որպեսզի վանահայր արտաքս վարելով կրկին առաջին դրության բերեին, սակայն յուրյանց թե՛ հայտնի և թե՛ գաղտնի մեքենայությունք խորտակեցան Խրիմյանի խորախորհուրդ հեռատեսության և գործունեության առաջ: Դեռ մինչև և ցայսօր կան իշխանաց մեջ, որ եթե պատեհ առիթ ունենան, վանքն առաջնորդության հետ միացնելով վանքի վրա ազդեցություն բանեցնել, բայց հույժ տկարացած են»⁵⁴:

50 Նույն տեղում, էջ 247:

51 Նույն տեղում, էջ 255:

52 Նույն տեղում, էջ 287-288:

53 Նույն տեղում, էջ 273-274:

54 Նույն տեղում, էջ 271:

1890-ական թվականների հայկական կոտորածների տարիներին Վարադա վանքը համարյա ամբողջովին ավերվեց: Թուրք ու քուրդ բարբարոսները թալանեցին նրա շարժական գույքը, դավթեցին հողերը, ջարդեցին ու ոչնչացրին մեքենաները: Սակայն հետագայում, հատկապես 1908 թ. հեղաշրջումից հետո Վանի վանքերը կրկին ոտքի կանգնեցին ու առաջադիմեցին: Այսպես, 1903 թ. նրանց եկամուտները կազմում էին 12544, իսկ 1908 թ.՝ 104962 դուրուշ⁵⁵: Հովսեփ Խլղաթյանը նշում էր, որ Վանի վանքերը մեծ եկամուտներ էին ստանում ինչպես անասունների, այնպես էլ հացահատիկի վաճառքից⁵⁶: Մի շարք տեղերում աճում է վանքերի հին կուլտուրաների արտադրությունը և արմատավորվում են նոր տեսակներ:

Այդպիսով XIX դ. վերջին ու XX դ. սկզբին Արևմտյան Հայաստանում վանական տնտեսությունը, թեև մասնակիորեն բարելավվում էր, ներքաշվում ապրանքակապիտալիստական հարաբերությունների մեջ, բայց ընդհանուր առմամբ սուլթանական կառավարության վարած հակահայկական քաղաքականության հետևանքով շարունակում էր քայքայվել: Մեծ եղեռնի օրերին երիտթուրքական ոճրագործները հայ ժողովրդի բնաջնջման ու արտաքսման հետ միասին ոչնչացրին նաև նրա վանական հողատիրությունն ու վանքերի և եկեղեցիների մեծ մասը: Այժմ Թուրքիայի նախկին հայաբնակ վայրերում կանգնած են հայկական սոսկ առանձին վանքեր՝ որպես հայոց երբևէ դոյուլթյան ու արարման լուռ վկաներ:

МОНАСТЫРСКОЕ ХОЗЯЙСТВО В ЗАПАДНОЙ АРМЕНИИ (вторая половина XIX в. — начало XX в.)

ՎԱՏԱՄԲԱՐՅԱՆ

Резюме

Монастырское хозяйство в Западной Армении во второй половине XIX — начале XX в. в результате шовинистической и антиармянской политики турецкого правительства переживало упадок. Монастыри и монастырские земли становились объектом постоянного грабежа и захвата со стороны турецких и курдских феодалов, а также частных лиц. Несмотря на это в ряде мест благодаря заботе и предприимчивости армянского духовенства монастырское хозяйство все-таки развивалось. В отдельных местах расширялись земли, улучшались орудия труда, увеличилась доля наемного труда. Но в период геноцида армян их монастырское хозяйство было окончательно уничтожено младотурецкими и курдскими разбойничьими шайками.

55 Տե՛ս «Ազատամարտ», 1909, հոկտեմբերի 17:

56 Նույն տեղում:

MONASTERIAL ECONOMY IN WESTERN ARMENIA
(second half of XIX century – beginning of XX century)

AZAT HAMBARYAN

S u m m a r y

In the second half of the XIX century and at the beginning of the XX century the monasterial economy of Western Armenia was declining as a result of chauvinistic and antiarmenian policy of the Turkish government. The monasteries and monasterial lands became the object of constant capture and robbery by Turkish and Kurdish feudals, as well as private persons. However, despite it, in a number of places monasterial economy was developing owing to the concern and enterprise of Armenian clergy. Lands were expanding, labour implements were improving, hired labour share was increasing. But in the period of Armenian genocide monasterial economy was eventually destroyed by Young Turkish and Kurdish robbery gangs.